

畿

輔

安

瀾

志

畿輔安瀾志

臣王履泰恭纂

漳河卷下

附載

雕馬河漳河支流也在大名縣北舊城南今涸舊渠  
猶存

方輿紀要雕馬河在大名府西南宋時引漳河至  
此絕衛河而注城中復北出以入於衛河

**謹案**金史劉豫傳撻懶以軍廢豫止刁馬河卽雕馬河也

沙河在大名府東北四十里

元城縣志沙河岸有沙河口孫甘店下有沙河路村

**謹案**此二河皆漳河漫決沙水填淤大名府南有馬河漳河故道水繞其後今爲沙所淤亦或雕馬河之遺迹矣元城縣志以沙河與流沙河爲二與

方輿紀要沙河一名流沙河之說不符而沙河所  
行之道與騅馬河適合惟以東北爲西北耳蓋支  
流分裂故蹟已湮莫能明也

艾家口渠在大名縣境明萬曆十九年開起縣西白  
水村至艾家口凡十二里達漳河故道復自艾家口  
支流入于府城濠

金家潭在大名縣東漳河故道水經此明正德間由  
艾家口決入衛潴而爲潭

白龍潭在魏縣西漳水滙流處也

方輿紀要唐乾寧三年河東帥李克用攻魏州敗兵於白龍潭追至觀音門觀音門卽魏州西門矣雙井在魏縣東南三十里明止德間漳河徙自雙井入衛

方輿紀要雙井鎮卽雙井渡爲漳衛合流之衝也拳壯河在廣平縣東十里自成安縣流入境至肥鄉縣復入于漳今已涸

廣平縣志在縣東十里舖上村

白渠拘淵水牛首水

漢書地理志魏郡武安欽口山白渠所出東至列  
人入漳武始有拘淵水東北至邯鄲入白渠趙國  
邯鄲堵山牛首水所出東入白渠水經注漳水  
又東北逕列人縣故城南于縣右合白渠故瀆白  
渠水出魏郡武安縣欽口山東南流逕邯鄲將南  
又東與拘淵水合水導源武始東山白渠北俗猶

謂是水爲拘河也白渠水又東又有牛首水入焉  
水出邯鄲縣西堵山東流分爲二水東入邯鄲城  
又東歷邯鄲阜又東出城合成一川又東澄而爲  
渚沁水東南流注拘澗水又東入白渠又東故瀆  
出焉一水取爲澤渚出梁縣之雞澤也謹案拘澗  
水小經注  
或刻作  
拘澗誤方輿紀要白渠在曲周縣西北舊自武  
安臨滹成安等縣至列人入於漳河今漣又西河  
在邯鄲縣東二十五里源出紫山流入府城西貫

家潭一名渚沁水今城南五里有渚河城西半里有沁河卽水經注所云牛首水自堵山分而爲二水者

謹案白渠入漳又有拘澗牛首二水來入其水亦非細流然在道元時已無水方輿紀要亦云今湮

寰宇記磁州邯鄲牛首山在縣西三十里又名曲

河

紀要作西河

源出縣西南平地而拘澗水終無聞焉

山海經云錫山牛首水出焉而東流注於滏與漢



志水經不合淦水合漳舊在鄴城西北白渠拘澗  
牛首三水皆其下流所在也並詳淦陽河篇

邯溝水

漢書地理志魏郡邯溝侯國師古曰邯水之溝

水經注白渠故瀆所在支分右出卽邯溝也與白  
渠同歸列人右會漳津今無水

邯水

水經注漳水右與枝水合其水上承漳水於邯會

西而東別與邯水合水發源邯山東北逕邯會故  
城西北注漳水故曰邯會也張晏曰漳水之別自  
城西南與邯山之水會今城旁猶有溝渠存焉其  
水又東北入於漳 〔方輿紀要〕邯山在邯鄲縣東  
亦謂之邯鄲阜舊志邯山在召代鎮去縣東南二  
十里邯水出焉歲久山移水絕故址遂湮

謹案漢書地理志魏郡邯會侯國武始漳水東至  
邯鄲入漳此文甚晦漳水何以入漳酈道元以爲

枝水張晏以爲漳水之別是也

石家河

謹案方輿紀要在肥鄉縣東五里北流入漳今河已數徙故道亦廢

五橋澤今無考

方輿紀要在廣宗縣東晉太和十年劉牢之救苻堅於鄴慕容垂北遁牢之追及垂於董塘淵又疾趨二百里至五橋澤中

康臺澤今無考

方輿紀要在曲周縣東地形志平恩縣有康臺澤  
符秦時爲閑牧之所

於泥河故道無存

方輿紀要在平鄉縣東十里

還河今堙

方輿紀要在平鄉東之夏莊村

蔡河在清河縣謝廬集

詳前河集

謹案元和郡縣志清河縣枯上漳渠者濁漳渠也  
源自上黨今鄴郡臨漳是也枯下漳渠者清漳渠  
也自鄴郡東北來非濁漳也隋大業中制使姚暹  
決從枯上漳渠入此亦名姚暹河煬帝征遼回泛  
舟於此謂之回鑾河大業十二年竇建德於廣平  
郡又疏北水入柳溝遂於永濟渠合流觀志所記  
似卽今之蔡河明實錄太宗永樂十三年山西解  
州言碯地水溢決豁口等處流入鹽池蓋由姚暹

渠涑水河並流水道淤塞乞發民修治之方輿紀  
要姚暹水在山西臨晉縣東南源出夏縣巫咸谷  
流經安邑縣及解州東又流入縣境南至鹽池十  
里本名永豐渠隋大業中都水監姚暹重開故渠  
因名姚暹渠蓋河東之渠亦暹所開而爲較著渠  
傍涑水與此蓋別柳渠疑卽故城縣之柳行港一  
名孟港者也蔡河之爲漳衛交通在昔如此

龍潭在故城縣西三十里相傳元末有龍起此水深

黑不可測今已湮廢斷崖猶深數丈

四義井在故城縣雙峯樓之南左曰黑琉璃井右曰  
碧琉璃井井泉甘冽深不可測明宣德初知縣戴恕  
又於漳河邊東西相距百武穿二井亦甘美人因目  
爲四義井

漳河枯槽乾隆五年議收漳水由此入海旋罷

〔一〕統志東至曲周縣界流入威縣界府志云肥鄉  
亦古黃河所經今廢不可考〔肥鄉縣志漳水俗

名小黃河又云黃河故道 曲周縣志大河故道  
在縣東軍營堤上等村宋元豐閒大河經流於此  
後南徙遺跡猶存今河形尚在上接元城下抵清  
河或曰古馬頰河或曰古漳河又曰沙河 夏元  
鏊漳水改由古跡議畧勘得和兒寨在廣平縣屬  
之張洞村約二十里皆係墾種良田並無河形前  
至曲周所屬之堤上村河形始現而中間若廣平  
所屬之蘇家莊及曲周之軍營等處彌望浮沙詢



之山人據稱係沙河舊跡當年漳水泛溢有淤成  
沃壤者有水勢不到仍係沙窩者惟邱縣以下至  
威縣及清河之軍營村河形漸有然兩岸河灘均  
屬興種地畝通計南北河身內民田居半之八九  
俯視村莊半有地居窪下之處名雖爲河並無行  
水之實漳水之性剽悍疾急初非人力所能預自  
康熙五十四年南遷入衛以來二十餘載並無橫  
流之患今議欲以人力挽之使別爲經流竊恐能

引水而使之行不能柔水而使之順也再查張洞  
村各處平行膏腴已屬認糧舊業今必欲奪之以  
成河無論沃產可惜高墪者已多需人力沙漲者  
復漫衍浮糝難任畚鍤是非數千丁夫數萬金錢  
不能畢其役一旦河勢既成不得不再議築隄以  
防其溢所費又不下巨萬萬一挑築於前淤塞於  
後不修則已成之功可惜修之則永久之道難期  
卽如原議所稱設立涵洞以時蓄洩昔人稱漳水

一石其泥數斗又土語相傳謂漳河不受制今觀各屬經水之處如肥鄉內外房舍或僅露鴟吻或盡沒泥中不可勝數脫涵洞旣設隨卽淤填豈不徒勞無益又或橫潰沖決毀裂閘座具害更大抑更有慮者原議從和兒寨東開挑至張洞村墟落稠密渺無河跡細詢鄉民知自和兒寨上溯元城之袁兒寨村北原有古沙河去村莊二三四里不等若必由此地疏濬以引北折之水使之回向南

流又復推之而使北往水性直下豈肯爲此曲折  
如竟從和兒寨北挑至張洞村於從未有河之處  
直達其勢其中間數里皆屬山東館陶所轄逼近  
鄉村沃野肥田實煩詩畫

古沙河走山東武城縣東南東北流至直隸故城縣  
曰沙溪河又名南河匯於縣西之龍潭自縣西關外  
牛谷莊起至馬家莊出境又東北至景州大洋村注  
於漫河

方輿紀要沙河在武城縣東南十五里故城縣西北二十里有太子營沙河所經也 故城縣志太

子營在縣西北二十里今名南化村北化村沙溪  
秋雨後卽有魚蝦春至則涸地多沙磧故名

謹案古沙河與元城之沙河各爲一水當是柳行  
港故道其上源久湮又太子營紀要以爲相傳唐  
太子建成討劉黑闥嘗駐於此縣志以爲竇建德  
自稱夏王二子嘗駐此均爲流俗譌傳可知

漫河上接故城縣瀝水入景州南境之大洋村名大  
洋河又東北逕小洋村王官店劉智廟又北逕白龍  
王廟十五里舖又東北逕十里舖迤西入患民渠又  
西逕亞夫村又東北逕十里舖又西北逕永興屯又  
東北逕向化村東出楊道村北風逕團裡村又北逕  
桑園村又東北入東光縣境之安家墳凡一百二十  
里而入阜城縣東南境又東北入東光縣之西境又  
東北入交河縣之東境又東南流八里澧河支分之

沙河入焉又北流逕左家橋小營河出焉至三岔河  
入於漳河

景州志漫河又名沙河 方輿紀要漫河店在阜  
城縣東南三十里自此達景州亦三十里今日新  
中驛

謹案漫河乾隆五年挑濬以消瀝水別有普通河  
一道自阜城縣小高家莊流入縣西南逕柴劉家  
莊曹家莊雙廟姚家莊大張家莊亦入交河縣之

周通家莊共長二十里一名普頭河或曰漫河在  
阜城名古沙河在東光稱普頭河阜城縣志屯氏  
河在縣東南俗呼爲漫河蓋川流遷徙難以稽考  
矣

絳河原名江江河亦名曲流河源出故城縣西南二  
十五里蓋因地勢高下而挑濬之者逕縣城西北入  
景州之西南境卽古沙河也以逕州境之江江村故  
名又東北過北江江村仍入故城縣界又東北逕趙



普村復入景州界又北逕王道童村玲瓏脊百礮西  
梧村舊市縣故城又東北逕司馬莊永興屯與大洋  
河合而北流入阜城縣界又東北逕東光縣合普頭  
河又東北逕交河縣境下入青縣之家鮑嘴歸運

水經注舊濱又市逕舊市縣故城北俗謂之溫城  
非也地理風俗記曰舊縣西北二十里有舊市城  
故縣也 禹貢錐指漳絳水入河及河徙之後漳  
絳循河故道而下故酈道元云水流間關所在著

自信都復見絳名而東入於海也然漢志信都之絳水則又有別志云故漳河在北東入海禹貢絳水亦入海縣北故漳卽禹河之故道而絳水出其南則漳水之徒流酈道元所謂絳瀆者也蓋漢時信都之漳水徙從其縣南故地志以此爲絳水而目縣北之瀆曰故漳河其後漳又復北道故水經叙漳水仍自信都縣西東北過下博縣西酈道元云絳瀆今無水此渠乃漳水一時之徙流漢志以

爲禹貢之絳水自後說經者動稱枯絳以證導河之所過皆班固禹貢二字誤之也

謹案阜城縣地勢平行東南隅稍低惟恃沙河宣洩積水年久淤廢景州之向化屯諸村積水由大道旁溝奔注阜城東光二縣接壤之區往往罹患乾隆五年阜景兩州縣詳委勘估循河舊跡由景州界石碣起上接江江河經阜邑之塞馬舖折而東北流逕沙窩張家棗行厲家莊趙門子莊曲家

莊陳家萊園入東光之普陀河

即普頭河

夏秋大雨時

行藉以宣洩冬春水落沙停每年於清明後一日

督率鄉夫疏濬二十三年添設老人渠長分段熟

管河身兩傍栽植柳樹今景州向化屯而下河分

兩支東支較北支稍深緣地勢窪下故也瀝水至

此分洩入東支者十之八北支者十之二又案

水經注漳水又東逕屯留縣南屈逕其城東絳水

注之又東逕壺關縣北禹貢錐鬲屯留本春秋晉

純留邑漢置屯留縣其故城在今縣東南十三里  
屯讀曰純壺關今長治縣東南則是絳水仍在山  
西境也史記北過涿水至於大陸鄭元曰地理志  
涿水在信都南索隱曰地理志絳水從系出信都  
國與潯沱漳河水並流入海正義曰括地志云絳  
水源出滋州屯留縣是也方輿紀要絳河卽阜城  
縣之胡盧河東流逕此又東北五十里爲三岔河  
亦曰三岔河此卽今之所謂絳河也

青草河在景州城西十里

李家河樊家河在景州

惠民渠在景州境明宣德中大河北決自德州潰入境內知州繻深自城北隄外開渠導入于頃窪水患始息年久淤塞嘉靖癸丑知州吳澤訪故渠濬之未成乙卯知州馬進階復自南隄外開濬轉西而北引入故道水勢得洩因萬厯間知州許東周復濬爲一支一支自城南三里鋪接大洋河起逕亞夫村抱隄

周西而北逕北關三里莊與東支賧合支自城東南  
皇殿村葛家莊起繞隄而北至三里莊與西支合過  
莊東北行又折而西逕七里莊南又北逕小新莊馬  
天一莊關家河西又東北逕修家河姚家河秦家河  
又東北逕桑園村八千頃漕此惠民渠之故道也

國朝乾隆五年知州楊裕祖署牧君士歲相繼開濬大  
洋河引入惠民渠渠故壅塞因於城西北隄外順大  
道疏之北抵向化村與西來之江江河合東逕八里

堂李家河溝又東逕修家等河入千頃窪較故道遠  
二十餘里

謹案邑人張葵年惠民渠記載州牧厠成霖語謂  
大洋江江州之氣口也惠民渠其腹背千頃窪其  
尾崗也血脉常通病何由而入景邑形勢誠如所  
言近日河流徑徙樊家莊迤北直下東光之安家  
墳抵漫河橋與千頃窪東西相距十數里則又非  
常口惠民渠舊迹矣各河下流名稱互舉要當以



江江村至向化屯橋之上爲江江河大洋村至三  
里鋪之上爲大洋河自三里鋪以下至北關城東  
支逕向化屯下至安家墳爲惠民渠岔支北入者  
乃阜城古沙河之號

蒲窪袁家窪蝗蟲窪俱在景州

古輿紀要蒲窪在州西七里袁家窪州西南三十  
里蝗蟲窪州南五里

沙河在交河縣東二十里首起縣東佟家莊逕李家

沙河頭東入東光縣之西境逕代家莊西北由董家溝復入交河縣之常樂村西分爲二一南由本村金馬駒至簸箕張家莊南入漫河一北由後陳家莊冷飯店等村至簸箕張家莊入漫河

倒流河一即蔡河在交河縣東北二十五里至三岔河新挑溝入於漳

方輿紀要倒流河在交河縣東北五十里縣東境之水皆滙於此西流四十里注於漳沱河故曰倒

流

謹案倒流河縣志云入漳紀要以爲注滹沱蓋新挑溝東接漳河西達滹沱倒流河逕溝口在漳滹沱之間也今攷河在縣東北二十五里大勢屈曲自南而北南接漳河北達清河又北入貫亥引河通於滹沱又東逕新挑溝復歸於漳河又青縣夾河窪內有古倒流河長三十里卽清河漳河之下游汪洋如淀前明紳士請於大渡村後建立堦隄

將上游之水遷徙由祝河嘴入歸潯沱達運河詳  
見潯沱河篇

小營河漫河支流也在交河縣東五十里起自東新  
橋村西流逕馬家莊張家莊高家窩韓家林至楊家  
橋西南入漳河

楊氣寺古河一名不成河在交河縣東北八十里  
韃韞窪一作達達窪在交河縣

方輿紀要交河縣東北七十里有達達窪明萬曆

中間溝五道以通絳河

謹案卽阜城之葫蘆河

窪旁之田始

無水潦之患

窪東窪

方輿紀要邑令馬中良議於交河縣東北九十里

窪東窪鑿溝十里入陽氣寺古河注於鴨綠淀

梅家窪在吳橋縣城東北三十里

曹家窪在吳橋縣城西十里

許家河亦漫河支流也一名曲區在河東光縣西南

十五里自魏家莊逕王陸家莊法隆寺至郝家莊仍歸漫河

趙照渠

方輿紀要在冀州東二里

葛榮陂

唐書地理志冀州信都東二里有葛榮陂貞觀十一年刺史李興公開引趙照渠水以注之方輿紀要在州西南二十里榮攻信都時築陂以灌

城

杜村溝

方輿紀要在衡水縣西南十里旁有窪地二十餘頃明宏治中開此溝以洩水患尋塞正德中復疏通之窪地填淤民獲種植之利

賈家溝

方輿紀要在武強縣東北東流合於漳水

通利渠

唐書地理志冀州南宮西五十九里有通利渠延載元年開 方輿紀要蓋引漳水以資灌溉

小河渠

方輿紀要在南宮縣東有三處卽濁漳分流河旁地極膏腴舊時民皆引渠溉田今廢

舊城潭卽南宮縣舊治明成化戊戌漳水沒縣城積而爲潭

聖水井



武強縣志在縣南二十里與衡水武邑地界相接  
各有龍堂故名二龍堂

滹沱故瀆

並詳滹  
沱河篇

水經注衡漳又逕東昌縣故城北又東北左會滹  
沱故瀆謂之合口 漢書地理志中山國信都故  
漳河故滹沱皆在北東入海

謹案地理志魏郡武安有寢水東北至東昌入滹  
沱河或以爲寢水卽漳水卽衡漳也又謂之橫河

漳水亦名大漳水兼有洩水之目考史記夏本記  
覃懷致功至於衡漳孔安國曰漳水橫流素隱以  
孔注爲非據王肅以衡漳爲二水然仍引漢志清  
漳濁漳以証之則衡漳卽清濁二漳也水經注主  
孔說故漳水篇或稱漳水或稱衡水或稱衡漳明  
其爲異名而同實也太平寰宇記衡水亦曰長蘆  
水卽濁漳之下流也長蘆水亦見水經注雖另出  
一名而仍是漳水況地理志武安下云欽口山自

渠水所出東至列人入漳又有寢水東北至東昌  
入滹沱則寢水非卽漳水甚明人乃以水經注漳  
水曾滹沱故瀆爲逕東昌縣故城遂以漢志東北  
至東昌入滹沱之寢水爲漳水而不知其非也

滹沱別水

詳滹  
沱河篇

漢書地理志河間國樂成滹沱別水首受滹沱河  
東至東光入滹沱河弓高滹沱別河首受滹沱河  
東至平舒入海 水經漳水又東北至樂成陵縣

別出北瀆酈注衡漳於縣無別出之瀆縣北者乃  
潯沱別水分潯池故瀆之所纏絡也衡漳又東分  
爲二又東逕弓高縣故城北

謹案方輿紀要樂成廢縣劉昫曰在今獻縣東南  
十六里弓高城在景州東北四十五里禹貢錐指

東漢以後浮陽

今冀州

麥戶

今青縣

東平舒

今大城

章武

今靜海

泉州

今寶坻

諸縣界中漳涓合流之瀆卽古

徒駭河西漢時大城河猶行之者也河既東徒漳

自入海安知北流之漳非古徒駭河歟漢書叙傳  
云自茲距漢北亡八枝其一存者卽徒駭孔疏徒  
駭是河之本道東出分爲八枝朱子亦以爲然故  
孟子集註簡潔仍爲二河水經漳水注云九河旣  
播八枝代絕遺跡故稱往往時存故禹般列於東  
北徒駭濱聯漳漳據諸說則是徒駭卽是大河亦  
卽是滹沱別水然班志渤海郡成平縣下注云滹  
沱河民曰徒駭河則是滹沱在成平者亦民自稱

爲徒駭耳非竟以爲徒駭也在當日已屬傳疑况  
久而愈漉更何所尋求姑存其說以俟考證焉可  
耳

### 從陂

水經注衡漳又東北右會桑杜溝溝上承從陂世  
稱盧蓬從薄亦謂之摩訶河東南通清河西北達  
衡水春秋雨泛漳津澤渚今觀津城北方二十里  
盡爲藪澤蓋水所鍾也陂水南北十里東西六十

步子午潭漲淵而不流亦謂之桑杜淵從陂南出

夾隄東派逕修縣

或譌爲循縣

故城北東合清漳漳泛

則北注澤盛則南播津流上下互相逕通從陂北

出東北分爲二一川北逕弓高城而北注柏梁澇

一川東逕弓高城南又東北陽津溝水出焉謂之

陽津口

謹案一統志引舊志卽千頃諸窪也梵語謂大爲

摩訶摩訶河言大河也水經注子午潭漲記水之

異也天津府志割去漲字別出子午潭一名非是

羊令渠

唐書地理志滄州清池東南七十里有渠注漳引  
浮水刺史姜師度開今涇



隄防

河門古隄在元城縣境

方輿紀要河門在舊魏州城外唐書魏州有河門  
舊隄魏帥樂彥禎嘗因以築羅城

列人隄

元和郡縣志列人故城在肥鄉縣西北三十里列  
人隄上 太平寰宇記列人城或曰列人埤縣居  
其上埤卽隄類也後魏孝昌中有人於此掘得破

船仍是杉材莫測其由蓋是瀘水久積淤泥遂成  
高岸 一方輿紀要或云卽漢時大河隄也 襍事  
記列人舊城在馬固村天啟壬戌肥鄉城壞知縣  
楊時晦移城於今治

神腴隄

唐書循吏傳韋景駿神龍中厯肥鄉令縣北瀕漳  
連年泛濫人苦之舊防迫漕渠雖峭岸隨卽壞決  
景駿相地勢益南千步因高築障水至堤址輒止

其北燥爲畝田又維艗船以梁其上而廢長橋功  
少費約後遂爲法及去人立石著其功

### 漳洛南隄

唐書地理志洛州雞澤縣有洛南隄永徽五年築  
太平寰宇記雞澤縣漳洛二水俱在縣東南二  
十里有漳河隄亦曰漳洛南隄 方輿紀要蓋昔  
時漳水在縣南界合洛河而東北注也 雞澤縣

志漳河隄高七尺濶七尺舊長二十五里今長八

里

濁漳隄

〔唐書地理志〕南宮西五十九里有濁漳隄顯慶元年築〔南宮縣志〕大隄在舊城南二里高五丈廣十丈障漳水北潰之勢謂之濁漳隄居民侵而畊之幾爲平地

漳水隄

〔唐書地理志〕堂陽西十里有漳水隄開元六年築

謹案景州亦有漳水隄方輿紀要漳水隄在州城外志云州昔當大河之衝地平土疏無岡陵之阻往往決溢爲患因於城外周迴築隄恃以爲固宋熙寧七年深州靜安令任迪議引永靜軍雙陵口河漑南北田二萬七千餘頃蓋決淤水爲漑田之利也

衡漳石隄

唐書地理志武邑北三十里有衡漳石隄顯慶元

年築

衡漳隄

唐書地理志清池西四十里有衡漳隄二顯慶元年築

衡漳東隄

唐書地理志清池西北六十里有衡漳東隄開元十年築

謹案以上皆古隄

務本隄在磁州北白道東長五里二百二十一步寬  
二丈高八尺

〔謹案此隄磁州志謂不知建於何年考陳所志疏  
漳議曰嘉靖三十八年漳河潰磁州以東臨漳以  
西四十餘里隆慶五年知州秦邦彥築務本大隄  
卽此臨漳縣西有務本村隄蓋連接二縣境

魏縣漳河隄

方輿紀要魏縣舊有漳河隄在縣南其南岸起自

臨漳延袤八十里北岸起自成安延袤五十里俱  
由縣境抵元城縣界永樂八年縣令楊文亨創築  
後屢增脩之 魏縣志明洪武三年創令縣治於  
五姓店環治設防惟土隄三里而已宏治四年知  
縣魏琦又爲土隄備漳水萬厯二十一年知縣田  
大年特築長隄五十五里西自臨漳縣界起東至  
縣境王兒莊止扞衛縣城

本朝康熙三十七年知縣王廷棟重修今廢



支河隄康熙三十八年巡撫李光地奏開支河一道  
四十三年知縣蔣芾於河南北兩岸築隄長十二里  
與河身首尾相等又築斜隄亦名蔣公隄自西北護  
城隄起至義井村止長十甲後支河湮塞隄亦隨圯  
今廢

魏縣橫隄在魏縣白仕望村長二里五分頂寬二丈  
至二丈四五尺底寬五丈高六七尺不等

北漳河南隄自白仕望橫隄起至羅兒莊後止長十

八里頂寬一丈二三尺至一丈五六尺底寬二丈五六尺至三丈高四五尺不等

南漳河南隄起自魏縣行善村後至小劉屯出境入元城縣界止長三十里四分頂寬五六尺至七八尺底寬一丈一二尺至二丈五六尺高三四尺不等

謹案

以上四隄今改隸大名縣

大名縣護城隄

大名府志附城隄環縣治以備漳水正德間知縣

吳拯築之植柳千株故又名吳公柳堤在大名縣城外卽護城堤也嘉靖四十五年知縣朱湘重修隆慶四年知縣李本意再修萬曆三十八年知縣趙一鶴復植柳堤外

老堤頭在大名縣二里明嘉靖乙酉舊堤圯知縣諸傅增築名曰諸公堤今爲支河中斷

支河萬曆二十年郡守屠時相

開

漳河堤大名縣城南接樓底舊堤

樓底口舊衛河決入處也有東西樓

底村舊隄  
卽衛河隄

至老堤止長三十餘里北接龍王廟舊堤

至艾家口止長二十餘里明隆慶五年知縣李本意  
築趙一鶴重築

華侯堤起大名縣西關堤北隅至回龍鎮長九十里  
明嘉靖二十七年知縣華舜欽築

京窑廠堤在大名縣艾家東窑廠明嘉靖二十七年  
知縣顧玉柱築

甄侯堤起大名縣駢村新河口至內黃田石界長百

里有奇明嘉靖三十四年知縣甄敬築

賀公隄在大名縣西明萬厯中知縣賀萬元築後廢

謹案以上諸隄以防衛之北决亦以障障之南潰今障由元城入衛去大名稍遠故諸堤亦廢今載於漳河下其東南一帶逼近衛河者仍詳衛河篇

萬家堤在元城縣城北地近翻坑積水之所也

崔家隄在元城縣長屯村下三保

范家隄在元城縣董家莊下

縣志里有范家灣范苑字形相似未知孰是

爐隄在元城縣東北爐隄村今訛爲爐裏村東與山

東館陶縣接界

東隄西隄東隄村在冢北集下西隄村在小灘鎮下

謹案以上諸隄  
並見縣志今廢

元城縣漳河南隄接大名縣界自王兒莊起至鴨窠  
村入館陶縣界止長三十一里頂寬五六七尺底寬  
一丈四尺高三四五尺不等

南柏村壩在元城縣乾隆二十三年築以斷李家口  
新分漳河岔支直趨府城南柏村大韓道之流

乾隆二十四年總督方觀承葺河濬復事宜奏畧  
河口漫灘應築攔河大壩以斷南流正溜所經築  
草壩長三十三丈五尺軟灘難抵老崖築土壩七  
十七丈俱底寬十丈頂寬二丈高一丈二尺並於  
大壩之外截築土堤一道以資重層保障  
以上皆屬漳河

鄆米隄卽鄆米二口在邯鄲縣境與肥鄉曲周接界  
明邯鄲縣令張第鄆米二口堵塞議畧漳河在磁

州界北岸名三臺口西至講武城東至孫家莊約十五里其岸稍卑每五六月間雨多水漲北至臨漳谷子里村分爲三股一股東向逕石村大漳村以達成安竇公隄一股北向逕吳村漳裏村流入邯鄲鄆米口一股西向磁州北漫入滏陽河河不能容北至閻家淺溢流而東經劉村左西等處至鄆米口北一里許名曰漢壩莊由西折而之東至新安鎮入肥鄉界又東至曲周之蘇胡寨歸入滏



陽河北漳河支流之故道也因漢疇莊飛沙淮壘  
致南來之水阻塞不通積於鄆米口之下水大隄  
决遂淹邯鄲縣東肥鄉縣西北曲周縣西南議者  
所以有堵塞二口之說但漳水不起自邯鄲二口  
一塞則邯鄲獨爲壑矣爲今之計若自磁州講武  
城而東臨漳孫家莊而西築閘一道以墮漳水使  
不至橫溢則三股之水可除鄆米二口亦無衝决  
之患於策爲上倘事隔兩省難以卒行則當疏邯

鄆漳河故道決漢壩莊而東達蘇胡寨口入於滏  
陽河將滏河兩岸自曲周至雞澤于家口大加疏  
濬或照官隄挑築幾尺以通洩暴發之水各縣均  
受益矣

謹案漳河自徙堵  
塞二口之議始息

漢壩

二統志在邯鄲縣東十里鄆米山北一里漳水舊  
流經此折而東入肥鄉曲周二縣界爲壩所壅時  
致潰決明萬曆初嘗議決漢壩而東達曲周蘇胡

寨口八於滄陽河後漳水東徙遂止

老許隄在廣平府城東

漳隄在廣平縣南三里

古隄在廣平縣南新鎮村

一統志古隄在威縣東北舊自堂陽至甘陵入縣  
界仰固集高二丈有奇久圯

故隄在廣平縣城西宋固村西北去城十五里北至  
孟固南至成安

廣平縣護城隄城南一里西至馬家莊東至董村亦  
名新隄知縣顧如華建

土隄在成安縣城外明嘉靖二十一年知縣杜聰築  
爲水所壞

本朝康熙十年知縣王楷增脩周圍一千七百一十八  
步高二丈有奇寬如之又於東南築外隄長七百六  
十步高一丈五尺寬一丈

大隄在肥鄉縣

肥鄉縣志知縣曹昕於四關外修築大隄周圍約  
十里以防漳水其後日淤日築外益高內益深秋  
夏暴漲輒與隄平知縣李文盛於隄內外密植柳  
椿固上以防浸潰康熙二年漳水遮隄浸灌城郭  
室廬俱壞知縣焦服祖修築濶五尺高三尺四年  
漳水淹沒爲平地四十九年庚寅知縣王能任因  
舊址築數層而罷辛亥知縣王建中增修仍於舊  
基築濶四丈頂寬一丈五尺高二丈許池濶二丈

深八尺旁植柳樹千株上築護城隄濶八尺高五尺三邑人賀應旌防隄議畧郡東有老許隄不知昉自何年其上雜置居民園圃村落相傳已久而水潦絕不相及此已事之明效彰彰者也請自今先立一式高一丈衝可二丈五尺許以令于民計肥地若干頃計肥隄若干丈計若干頃可築若干丈一倍立小旗十倍立大旗白倍立總旗俱擇老成有心計者董督巡視其有虛冒詐僞者自總旗

以下次治之其如式先完者卽釋去而胥吏不得預其事焉如是則人如自謀其家未有不求亟畢乃務而早歸者計每歲周圍增二丈五尺十歲可增二十五丈其上場厠廬舍令民以次修葺以成村落侵民地以官價償其不願入官以俟其後之自爲場廬者聽其便而免其所佔之租稅四面四角分八區將在官之月有十五集移置其上以次輪流如是則人有趨高之便而又有逐利之謀未

有不急而求自便其身圖者其四面四角之正衝  
開八孔道以通車設八譙樓以瞭遠外關者寬其  
界以資行旅內窪者高其路以達關廂而其餘垣  
墉外關一切禁民不得擅行出入當外城焉如是  
則旣樂園廬之便又幸防守之嚴人未有不急而  
思就爲室家計者不惟可以防水兼可以禦寇而  
內城之倉庫盈溢亦可自是高枕無憂矣

舊漳河隄在曲周縣城東二十里起昭臨安兒寨至



韓村

高口隄在曲周縣相公莊

李軍門隄起曲周縣水德堡東魏村經邱縣界至張  
遂南北五十里明萬厯間築

新漳河隄在平鄉縣順治十二年修

順治九年總督李祖蔭修新漳河隄奏畧曲周踞  
平鄉之上游沿河綿亘原有大隄自此隄墮壞一  
遭水潦漳河遂由曲入平平地窪下而平北距鹿

復有高隄水入而不能出平民遂急修舊隄以自  
救而曲周因有水難下洩之患是水之害平害曲  
者其害原皆在曲而不在平也曲隄修則水不入  
曲何由入平平隄竟成無用若曲隄不修而欲去  
平隄則水過曲而入平爲曲害者小水至平而遂  
不能出爲平害者大况曲亦未免過水之害則何  
如修曲隄而兩縣俱利也今相度地形溯源上流  
日觀漳水來自西南入肥鄉歷曲周稍東北折至

楊家漳洛等村轉爲正南正北順平鄉西界之隄  
直下山在上游平居窪下若曲周順河有隄則水  
不至曲何由入平隨諭令曲境順河之隄以十分  
爲率曲修其六平修其四此後曲周自行修葺不  
得仍扳平鄉

新漳河西岸在平鄉縣境康熙四年知縣張應麟買  
地五畝築囚距鹿于賈莊前築橫隄故也

還河口北岸在平鄉縣境順治十七年知府郭礎修

以上皆屬故道支流

堰水隄在清河縣新集洪河南去縣三十里東自御河厓西至鯨隄高丈餘長五十里明宏治中築

大隄在廣宗縣城西一里以護城南起三周村歷侯家寨繞城西北至小平臺止亘三十里今多毀廢

小隄在廣宗縣城西五里起西霍城寨歷南五里莊至太平營村止亘二十里明宏治四年知縣吳亮築  
本朝康熙四十七年知縣吳存禮大修漳河東岸隄與

西岸等南起三周北距板臺曲折百餘里共一萬九千丈有奇基厚二丈頂寬八尺豎高七尺後築小隄水患以免

城西堰在廣宗縣城西小漳河折而東北流康熙三十一年居民私築堰以障水被水村民以致持械相爭知縣吳存禮命平之不復築

城東岡順治十一年漳河溢廣宗縣東北隅城下舊有水道自外入內東街地勢窪下水深丈餘知縣龔

承宣建閘以洩水居民便之

以上俱屬老漳河

長蘆隄在鉅鹿城南迤邐東北遠近不一約百餘里  
順治十二年知縣傅登庸重築十七年知縣王鼎重  
修

新河縣護城隄在新河縣城外周長七里餘元至正  
間築

南宮縣護城隄在南宮縣城隍外隄外又爲重隄隆

慶六年知縣喬巖築高三丈基廣二丈五尺

南宮縣長隄在南宮縣舊城北直抵冀州海子廣數丈明萬厯元年知縣喬巖以古隄坍沒重築大隄口六處各長七丈基高二丈上廣一丈小隄口三處每長三丈五尺高二丈上廣一丈萬厯五年知縣邢侗

重脩

謹案此卽堂陽之漳水隄一統志漳水隄在新河縣西縣志以爲唐開元時築

輿地考 卷之六  
埧口大隄在冀州西五十里接新河縣界順治十五年因舊隄脩築

南埧道在冀州城南北接關廂南抵太尉廟明天啓三年知州喬可大

本朝康熙三年知州楊遇春雍正三年知州林緒光皆重脩

西埧道在冀州城西東至關廂西至元頭村順治間署州事通判李一盛重脩並建木橋其上



捍水隄

一統志在深州北二十五里歲久頽敗惟存二阜  
巉然屹立俗呼爲紫金山

衡水縣護城隄

衡水縣志隄環隍外高五尺基廣七尺上有垣明  
嘉靖二十年知縣李完重築三十年知縣嚴修繼  
築今圮舊城隄環城而南南抵冀州綿亘三十餘  
里高五六尺不等今亦多圮

沿河隄

衡水縣志南岸起千馬村迤焦網村北岸起圈馬村迤高村高五六尺不等明宏治十七年知縣文皓築

劉公隄

衡水縣志在漳河南岸去河百餘步起自棗園村以西迤杜村談家莊一帶遠約三十餘里高六七尺遇水不害民獲利焉萬曆三十三年知縣劉化

龍築

新隄又名防河隄在衡水縣漳河西岸東北抵深州  
武強西南抵冀州棗強亘百餘里高三丈廣一丈康  
熙初年築

冀州志防河隄東隄自冀州尚家窯起至衡水縣  
夏家莊止長八十五里西岸自衡水縣康家莊起  
武邑縣韓家莊止長七十里

護河隄

冀州志東岸自衡水縣孟家村起至岔河村北武強縣界止長五十里西隄自衡水縣謝漳村起至羅家莊北武強縣界止長五十里

武邑縣護城隄

武邑縣志古築以障水高一丈西南迤東北長十二里

龍池河隄

冀州志北岸屬武強有隄南岸屬武邑無隄凡遇

水漲獨受其害雍正十二年武邑知縣張藻築長  
一千五百丈沿河一十七疇分脩

### 武強隄

一統志在武強縣城外四面皆有隄高闊數丈昔  
時築以障水遺址猶存乾隆十七年另築月隄長  
三百丈

以上新漳河隄

橋渡

浮橋在肥鄉縣

舊唐書韋景駿傳漳水舊有架柱長橋每年修葺  
景駿又改造爲浮縣自是無復水患

謹案宋史程昉傳又塞漳河作浮梁於洛州蓋傲  
景駿之遺績而其地無考

鉅橋在曲周縣

杜佑通典紂鉅橋倉在曲周縣 方輿紀要舊在

縣西杜佑曰紂鉅橋倉在曲周縣水經注橫漳北  
經鉅橋邸閣西舊有大橋橫水故曰巨橋昔武王  
伐紂發之賑殷饑民服虔曰鉅鹿水之大橋也當  
在鉅鹿縣劉伯莊曰橋以高廣名也

謹案方輿紀要大名府志濬縣下又有鉅橋志云  
在縣西南五十里鹿臺亦在焉今有鉅橋鎮蓋傳  
疑書疑故兩見也

以上二橋古橋之在漳河者

草橋在磁州城東南五十里之講武溝南直河南彰德府安陽縣豐樂鎮之北以木爲之輦土其上冬建

夏撤

磁州志漳河草橋舊在五吉村卽武吉村每歲九月同安陽臨漳合建夏初則撤後五吉之水分而爲二始下移於講武城然河身濶幾三百丈歲費金錢萬計順治十一年州人官翰林張潛請改建於洋漁口此處河身窄狹歲可省工料三之二旋



因用兵置安陽驛站於豐樂鎮設磁州驛站於花  
村遂復移橋於上漆垣再移於趙村康熙二十三  
年河口冲决又移於下漆垣其費幾與講武城等  
二十四年知州任塾以兵罷撤站議仍復於漁洋  
口不果二十七年知州朱廷相以每歲分上搭蓋  
勞逸不均同安臨會商挨次輪流永遠爲例 廣  
平府志漳河草橋所用物料工役皆出於沿河村  
莊居民苦之乾隆八年三州縣會詳直豫督撫咨

部於豐樂鎮渡口建大木橋以九年爲始每年豫  
省撥存公銀二百六十兩給安陽臨漳二縣直隸  
撥存公銀一百三十兩給磁州輪年承辦至沿河  
居民止用力幫工一切物料永禁派累

官道渡口在磁州南

磁州志漳水自吳家河入磁州西南境至磁州講  
武城爲官道渡口

利涉橋在魏縣城東明萬歷間知縣李幼淑建

長橋在魏縣城東南八里明宏治間知縣鮑琦建

二統志長橋在魏縣東郭化縣村長十里以防漳

水

迴瀾橋在魏縣東關外明萬厯間知縣田大年建

柱中橋在魏縣東關外亦知縣田大年建

漳寧橋在魏縣南郭外爲內黃等處通衢

義橋在魏縣城北一里以木爲之乾隆四年知縣馬

襄建

于村渡

元史河渠志御河出大名路魏縣界經元城縣泉  
源鄉于村渡 天名府志魏縣舊志在元城于村  
渡西五里

東石橋在大名縣東門隄外

西石橋在大名縣西門隄外

南石橋在大名縣南門隄外

浮橋在舊河上今廢

磚橋在大名縣東北十里今廢

楊家橋一名永濟橋在元城西北

大名縣志永濟橋在楊家村居民呂洧等建

申家橋在元城縣西北

以上諸橋渡皆在現行漳河之上

南郭護城橋

成安縣志明萬曆二十九年邑人進士袁魁同義民孔憲周等創建三十二年暴水冲頽知縣劉永

脉邑人副使蔡可教建

東橋

二統志在出周縣東漳滏合流處

于家口橋在雞澤縣東

漳河橋

廣平府志雞澤東十五里

小漳河橋各因村地而得名任平鄉縣者麟兒橋河

古廟橋董固橋陳樊莊橋霍城寨橋鄧家橋蘇家橋

在廣宗縣者閻家橋王家橋沈馬橋青村橋東呂橋  
魏村橋東召橋板臺橋在鉅鹿縣者花窩橋張王橋  
王六橋卽往南宮大道高一丈五尺寬一丈七尺乾  
隆二十五年修稍北爲馮家橋過蘇家橋又北曰臺  
頭橋極北曰屋深橋

夏莊橋在平鄉縣東七里

以上諸橋俱屬漳河故道支流

新橋

〔鉅鹿縣志〕在漳水上邑人楊時舉建

宏濟橋石橋在威縣南門外

景州漳河橋在秦村西張田河上康熙三十年州人  
孫枝裔建

惠民橋二一在景州城南一在城北明嘉靖間知州  
高進階建

通濟橋在景州西隄外乾隆六年重修

廣川橋在景州北郭惠民渠上



謹案景州大漳河橋四俱無名乾隆二十三年重修江江河橋一曰孟家橋惠民渠橋四曰三里橋響水橋惠民橋通濟橋江江河合惠民渠以下東支橋三其二無名其一曰向化屯橋北支古沙河橋一無名皆係木橋

北閣橋南閣橋俱在阜城縣湯河上雍正七年知縣鄭煥重修

劉家口橋趙門子橋倪家莊橋俱在阜城縣乾隆六

年建

西濟橋在倒流河上

謹案方輿紀要以西濟橋跨李村土河非也又考  
交河縣志無橋梁之目今按漳河一帶自三岔河  
以上橋四曰韓家橋盧家橋王家橋青牛莊橋自  
三岔河以下橋四俱失名漫河至三岔河橋四曰  
石橋姜家橋繳家莊橋左家莊橋倒流河橋三曰  
西濟橋齊家橋其一失名蓋交邑各河久廢縱有

橋梁無闕利涉修建年月亦無可考以上諸橋惟西濟著稱故附次於此

虹系橋一名馬頭橋在東光縣西三里西光廢縣側明末里民王允升趙之麟重建

鄒家橋在東光縣城西八里漫河之西架木長十三丈高一丈二尺雍正十二年重修

謹案漫河自羅村橋五里至張家橋十里至漫河橋五里至劉歇醫橋五里至鄒家橋十五里至永

濟橋俱係磚砌各長十二丈高一丈二尺

張家橋在東光縣之河西王家集東南明末里民張九念建

永濟橋在東光縣城西二十五里明崇禎間貢生汪邦俊建

本朝乾隆五年疏通漫河積水縣民重建

許家河橋在東光縣城西十五里曲區河上曲區河卽許家河

普頭河橋有三曰楊家橋李家河橋通濟橋通濟橋  
在王家集北鄉民楊子才重建

以上諸橋俱屬老漳河

衡水石橋在衡水縣西半里甃石長三十九丈八尺  
寬二丈五尺高三丈三尺水洞三旱洞三各濶四丈  
一尺

〔衡水縣志〕天順九年知縣楊儼奏准深冀三州棗  
強武邑二縣協濟創建圮而重修嘉靖三十二年

義民徐廷募建石橋費銀七萬餘復圯於隆慶三年大水鄉民賈從仁趙儒捐資再修壯麗雄偉跨若長虹

浪子橋一名郎子橋在衡水縣西南四十里今廢猶有村名郎子村

趙橋在武邑縣東北三十里之趙橋集

畿輔通志趙橋津在武邑縣北三十里漳河西岸圈頭義渡在武邑縣西北十八里邑人翟國棟置

韓家莊義渡龍店村官渡俱在武邑境

交津口渡在武強縣東

〔邑人傳位交津口記畧交津者何謂兩水相會而  
中有水以注之故曰交也兩水者何漳水滹沱也  
經謂漳水歷武邑阜城又東北至昌亭與滹沱河  
會是也中有水以注之者何白馬河也其上承滹  
沱東逕樂鄉縣北饒陽縣南又東南逕武邑北而  
東入衡水蓋白馬溝也今曰之交津與昔日異漳

水之河道有常滹沱之變遷無定自客歲以迄今  
春滹水自東鹿經下博東至武邑西北值漳河而  
漳河西岸外竟成澤國陸地易爲水區崖岸大半  
缺略有興利除害之責者能不怵然動念哉

劉麟橋

二統志在阜城縣北接交河界有劉麟鎮

清漳古渡在阜城縣城南十二里水發時鄉人置舟  
以大索橫水上兩岸繫以木椿往來者挽索以渡亦



稱河口義渡今漳流已斷其名猶存

南濟橋在交河縣南五里又東爲東濟橋俱跨漳水上

范橋

金史地理志清州會川鎮有范橋

登瀛橋

青縣志在縣南七十里杜林鎮

郭橋

金史地理志滄州清池鎮五郭曠舊有郭橋後廢  
以上諸橋渡俱屬新漳河

祠廟

漳河神壇在平卿縣

一水經注衡漳又東逕銅馬祠東漢光武廟更始三年秋光武追銅馬於館陶大破之故關西號世祖曰銅馬帝也祠取名焉廟側有碑述河內脩武張導字景明以建和三年爲鉅鹿太守漳津泛濫土不稼猶導披案地圖與丞彭參椽馬道嵩等原其逆順揆其表脩裏防排通以正水路功績用成民

用嘉頰題云漳河神壇碑而俗老碩儒猶搨斯廟  
爲銅馬劉神寺

謹案建和是後漢和帝年號張景明爲袁紹說冀  
州牧劉瓛讓位事在獻帝初平二年相距四十四  
年不應如是之久建和字誤當作建安三國志臧  
洪荅陳琳書曰昔張景明親登壇歃血奉辭奔走  
卒使韓牧讓節主人得地卽其人也又太平寰宇  
記邢州沙河縣下引山海經云湯山湯水出焉隋

圖經云湯後側巖上有石室一戶無塵穢俗號曰  
聖人室下經銅馬廟有碑題云漳河神壇則是壇  
固非一處也

漳衛神祠在大名府元城縣南關外合祀漳衛二河  
之神廟安文武二像每歲伏秋汛過作樂侑神大名  
道府及元城大名二縣主其祭

漳河廟一在成安縣城外東南河濱順治十一年知  
縣張一魁建康熙十一年重建一在肥鄉縣北隄上

春秋二仲擇吉祭之

漳滏二神祠在曲周縣東橋南河畔

水利

漢史起渠

漢書溝洫志魏文侯時西門豹爲鄴令有令名文侯曾孫襄王爲羣臣祝曰令吾臣皆如西門豹之爲人也史起進曰魏氏之行田也以百畝鄴獨以二百畝是田惡也漳水在其旁西門豹不知用是不智也知而不興是不仁也於是以史起爲鄴令遂引漳水溉鄴以富魏之河內民歌之曰鄴有魏

令兮爲史公決漳水兮灌鄴旁終古瀉鹵兮生稻

梁 太平寰宇記魏縣舊漳河在縣西卽史起所

決溉鄴旁者 禹貢雖指衡漳者河北之利害也

魏西閔豹史起皆引漳水溉田以富河內後漢元

初二年復修故渠以溉田建安中曹公平鄴又竭

漳水回流東注號天井堰里中作十二磴磴相去

三百步令互相灌注一源分爲十二流皆縣水門

水所溉之處名曰晏澤陂故左思魏都賦云澄流



十二同源異口也東魏天平中決漳水爲萬金渠  
亦曰天平渠唐咸亨三年又引爲金鳳菊花諸渠  
以溉鄴田至德後遂廢宋天聖四年王公上言今  
相魏磁洛之地並斥鹵不可畊請募民復十二渠  
詔河北漕司規度而議者謂漳水岸高難開導渾  
濁不可溉田議卒不行後沿爲河北轉運使奏導  
相衛邢趙天平晏陂諸渠溉田至數萬頃由是觀  
之漳水之爲利大矣然冬官不修溝逆地防水屬

音注不理孫音遜則亦有害曹操慕容垂郭子儀之攻

鄴皆引漳水以灌其城此雖出於人爲亦以水勢  
乘高而下能沈平地故也明正統十五年漳自安  
陽決而南又東入衛袤百餘里廣四十里土田悉  
成汙萊其爲害不亦大乎

### 鷓鴣陂

方輿紀要在內黃縣西南五十里陂周八十里蒲  
魚之利土人所資魏收志臨漳縣有鷓鴣陂九城

志洹水縣西南五里有鷓鴣陂陂蓋與成安縣及河南之臨漳縣接界矣或曰舊陂縱橫廣遠今水流斷續故餘址分見於臨漳及縣境也

### 利物渠

唐書地理志相州成安縣有利物渠自滏陽下入成安并取天平渠水以溉田咸亨四年令李仁綽開方輿紀要利物渠自磁州下流入成安縣

謹案魏書地形志天平中決漳水爲萬金渠今世

號天平渠北史魏本紀東魏孝靜帝天平三年冬  
十月己巳發大兵萬人築漳濱堰三十五日罷卽  
是也

董塘陂

方輿紀要在曲周縣西北十五里魏晉時導漳水  
入陂爲灌溉之利今涸晉太元十一年劉牢之追  
及慕容垂於董塘淵爲垂所敗卽此

謹案漳水湍悍橫決不可以興水利史起誚西門

豹不能用漳謂未盡仁智亦祇就臨漳以上言之  
魏武之治漳也至開十二磴以分其流山确堅實  
可受約束也成安以下郊原平楚隄岸壩堰堵禦  
不暇閘座涵洞何所設施昔賢諄諄告誡有由然  
也觀錐指所云則知大工之不可妄舉而小利之  
不可倖邀今載水利數則以存昔人引用漳水之  
遺意以備考鏡云